



Datë: 14.02.2025
Numër Protokolli: 2462/2025

A.nr.289/2025

Këshilli i Pavarur Mbikëqyrës për Shërbimin Civil të Kosovës – Kolegji për Shqyrtimin dhe Vendorsjen e Ankesave, në përbërje nga: Malsore Gashi-Bajraktari, kryetare, Eshref Shabani dhe Ardita Haxhnikaj-Demi, anëtarë, me Atdhe Gashi, në cilësinë e procesmbajtësit, ka shqyrtuar ankesën me numër A.nr.289/2025, të datës 10.02.2025, të parashtruar nga ankueset J.F-L dhe L.G, kundër organit të punësimi/Agjencia për Informim dhe Privatësi, në çështjen juridike “*Kërkesë nga marrëdhënia e punës*”, duke vepruar në pajtim me nenin 6 paragrafin 1 nën paragrafin 1.1, nenin 16 paragrafi 3 dhe nenin 18 paragrafin 1 nën paragrafin 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, i ndryshuar dhe plotësuar me Ligjin Nr.08/L-180 si dhe në mbështetje me dispozitat e Rregullores Nr.02/2018 për Procedurën e Shqyrtimit dhe Vendorsjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me datë 14.02.2025, mori këtë:

V E N D I M

I. Aprovohet si e bazuar ankesa A.nr.189/2025 e datës 10.02.2025, **ashtu që detyrohet** Drejtoresha e Përgjithshme e Agjencisë për Informim dhe Privatësi që brenda afatit prej 15 ditësh nga dita e pranimi të këtij vendimi të shqyrtoj Kërkesën me numër protokolli 1143 të datës 16.12.2024 të parashtruar nga ankueset J.F-L dhe L.G, dhe të nxjerr akt administrativ në pajtueshmëri me dispozitat ligjore në fuqi.

II. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Nëpunëset civile, J.F-L dhe L.G (në tekstin e mëtejme referuar Ankueset), më datë 10.02.2025 kanë parashtruar ankesë me numër protokolli 918/2025, e regjistruar në emrin e ankuses J.F-L, në Këshillin e Pavarur Mbikëqyrës për Shërbimin Civil të Kosovës, për shkak të heshtjes administrative të Agjencisë për Informim dhe Privatësi, në ndërlidhje me Kërkesën me numër protokolli 1143 të datës 16.12.2024, për ekuivalentimin e pozitave të tyre me pozitë të Inspektorëve pranë kësaj Agjencie.

Këshilli i Pavarur Mbikëqyrës për Shërbimin Civil të Kosovës (*në tekstin e mëtejme referuar: Këshilli*) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, ka proceduar kërkesën për përgjigje në ankesë tek Agjencia për Informim dhe Privatësi, ndërsa kjo e fundit më datë 05.03.2024 ka përcjell shkresat e lëndës lidhur me çështjen përkatëse ankimore.

Kolegji për Shqyrtimin dhe Vendosjen e Ankesave (*në tekstin e mëtejme referuar: Kolegji i Këshillit*), pasi ka shqyrtuar të gjitha shkresat e lëndës, ka konstatuar se meqenëse nuk është nxjerr akt administrativ lidhur me kërkesën e ankueseve, atëherë ekziston baza ligjore që të detyrohet Drejtoresha e Përgjithshme e Agjencisë për Informim dhe Privatësi, të nxjerr akti administrativ në pajtim me legjislacionin në fuqi lidhur me shqyrtimin e kërkesës me numër protokolli 1143 të datës 16.12.2024, të parashtruar nga ankueset, *sepse:*

Kolegji i Këshillit, nga administrimi i provave të lëndës ka gjetur se ankueset janë të punësuar në Departamentin për Qasje në Dokumente Publike, pranë Agjencisë për Informim dhe Privatësi me, gjegjësisht ankuesja J.F-L sipas Akt emërimit me numër protokolli 498 të datës 22.05.2024 ushtron pozitën e punës *Zyrtare në Divizionin Raportim dhe Monitorim*, Klasa Profesional 2 , I14, Koeficienti 5.2. ndërsa ankuesja L.G sipas Akt emërimit me numër protokolli 501 të datës 22.05.2024 ushtron pozitën e punës *Zyrtare e Lartë në Divizionin për Raportim dhe Monitorim*, Klasa Profesional 1, I12, Koeficienti 5.75.

Ndërsa, lidhur me pretendimet ankimore të ankuesve të parashtruara si në ankesë në drejtim të heshtjes administrative, Kolegji i Këshillit ka analizuar shkresat e lëndës ku edhe ka gjetur se ankueset më datë datë 16.12.2024 kanë parashtruar kërkesën me numër protokolli 1143, përmes të cilës kanë kërkuar ekuivalentimin e pozitave të tyre me pozitat e inspektorëve, mirëpo nga shkresat e administruara të lëndës dhe thëniet si në ankesë rezulton se të njëjtat nuk ka pranuar përgjigje nga organi përkatës i punësimit në raport me Kërkesën e datës 16.12.2024.

Kolegji i Këshillit, ndërlidhur me rregullat e veprimeve procedurale të një organi publik, ju referua dispozitave të Ligjit Nr.05/L-031 për Procedurën e Përgjithshme Administrative (*tutje referuar: LPPA*), përkatësisht nenit 10 paragrafi 2 ku përcaktohet se: *2. Organi publik zhvillon procedurën administrative sa me të shpejtë dhe me sa më pak shpenzime, për të dhe për palën, duke mos cenuar çfarë është e nevojshme për një rezultat të ligjshëm e të përshtatshëm të procedurës administrative*, nenit 98 paragrafi 1 dhe 2 ku përcaktohet se: *1. Procedura administrative nisur sipas kërkesës, do të përfundojë sa më shpejt që të jetë e mundur, por jo më vonë se sa afati i përcaktuar me ligj të veçantë për atë lloj procedure. 2. Në rast se ligji i veçantë nuk ka paraparë një afat, siç është paraparë në paragrafin 1 të këtij neni, afati i përgjithshëm i zbatueshëm për përfundimin e procedurës administrative është dyzetepesë (45) ditë nga fillimi i saj*, si dhe nenit 97 paragrafi 1 të këtij ligji, ku përcaktohet se: *1. Një procedurë administrative e nisur sipas kërkesës, përfundon me njoftimin e një akti administrativ apo lidhjen e një kontrate administrative, dhe si rrjedhojë në kuptim të këtyre dispozitave ligjore si dhe bazuar në shqyrtimin e provave materiale të çështjes*, Kolegji i Këshillit

konstatoi se organi përkatës i punësimit, në rrethanat e rastit konkret, nuk ka vepruar në pajtueshmëri me dispozitat përkatëse ligjore, në raport me Kërkesën me numër 16.12.2024, të parashtruar nga ankueset, ngase sipas bazës ligjore si me sipër, vullneti i organit publik në realizimin e autoritetit publik formësohet në procedurë administrative dhe manifestohet në formën e njërit prej veprimeve administrative, siç janë: akti administrativ; kontrata administrative apo akti real, dhe se në vlerësimin e Kolegjit, organi përkatës i punësimit, në kuadër të autorizimeve të përcaktuara me legjislacionin në fuqi, është dashur që të nxjerr akt administrativ në kuptim të vendosjes dhe të njoftoj palën për aktin e tillë, brenda një afati prej 45 ditësh sikurse përcaktohet me nenin 98 paragrafi 2 apo afatit të vazhduar sipas nenit 99 paragrafi 1 të LPPA-së.

Rrjedhimisht, në vlerësimin e Kolegjit të Këshillit, heshtja e organit të administratës, në këtë rast, Drejtoreshës së Përgjithshme, në raport me Kërkesën me numër protokolli 1143 të datës 16.12.2024, cenon të drejtat e ankuses në kuptimin e të drejtave procedurale dhe për rrjedhojë edhe vendosjes në mënyrë meritore, ngase ashtu sikurse është thënë në arsyetim të këtij vendimi, në kërkesën e parashtruar tek organi i punësimit, ankuset pretendojnë ekuivalentimin e pozitave të tyre me pozitë të Inspektorëve të tjerë pranë Agjencisë për Informim dhe Privatësi, dhe se organi përkatës i punësimit duhet të shqyrtoj kërkesën e tyre dhe të vendos lidhur me pretendimet e ngritura.

Kështu që thënë si me sipër e duke u bazuar në nenin 18 paragrafin 1 nën paragrafin 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi të aprovoj si të bazuar ankesën e datës 10.02.2025, në kuptim të shkeljeve procedurale, dhe si rrjedhojë detyroj Drejtoreshën e Përgjithshme të Agjencisë për Informim dhe Privatësi që në respektim të dispozitave procedurale të shqyrtoj Kërkesën e datës 16.12.2024, dhe të nxjerr akt administrativ në përputhshmëri me dispozitat ligjore në fuqi.

Vendimi hyn në fuqi ditën e nënshkrimit nga Kryetarja e Kolegjit.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm, mund të iniciojë konflikt administrativ në gjykatën kompetente, Gjykatën Themelore në Prishtinë/Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.289/2025

Atdhe GASHI

Procesmbajtës

Malsore GASHI-BAJRAKTARI

Kryetare e Kolegjit

Vendimi i dorëzohet:

- Përfaqësueses së autorizuar, ankueses J.F-L;
- Agjencisë për Informim dhe Privatësi
(Drejtoreshës së Përgjithshme dhe Menaxheres së Burimeve Njerëzore); dhe
- Arkivit të KPMSHCK-së.